

*Letera di 22 del dito.*

Curlogoli con 6 galle et fuste 4 se partì a do hore de note de qui dil Zante, va a la volta di Modon, et una fusta di Coron era con lui va a disarmar, sichè Curtogoli va di longo con 6 galle et tre fuste verso Rhodi per star in quelli mari, et è per star qualche zorno poi andar a disarmar. El dito è maridà a Rodi, è di anni 45. Essendo quì al Zante mandò per mi, et li andai a parlar. Mi disse li mandassi pani di seda et di lana, li fei portar, comprò per ducati 400, et pagò cortesemente. Va a Modon dise per zercar ladri. Le fuste 6 di ladri è passate et tirano alcuno per tuor qualche navilio. Da Patras si ha, li andò Litussi Chiecaia con 12 galle per far butar artellarie et altre monition de li. A hore 23 vete dite 12 galle verso Chiarenza.

*Letera di 23 dil dito.*

L'armà dil Turco passò de qui in questo dì con bellissimo vento, va verso Modon, si tien da matina sarà li a bona hora; erano vele 56 et uno gripo de vituarie. A hore 22 fo scoperte al Cao di la Zefalonia vele 9, qual tengono la volta de quà. Per uno vien da Modon, partì luni a dì 19 si ha, che a dì 17 le cinque fuste di ladri andò a Coron et vendè uno schierazo candioto cargo di moscatelli di bote 150, formazi peze 1500, che fo preso con dito schierazo, a l'emin di Coron per aspri 20 milia. *Item*, era zonto li a Gerarchi uno mio lontan di la tera, Curtogoli, a li 19, et avea con sè la galla candiota et uno gripo candioto cargo di vini et formazi. Et che Curtogoli se scusava haver trovato la galla et il gripo in bando. Tegno che l'lasserà la galla a Modon o a Coron. El proveditor dil Zante ha spazà uno per haver la dita galla.

*Dil dito zeneral, di 28, ricevute ut supra, tuta in zifra.*

Zerca questo venir de l'armata Cesarea, et che'l capitano de l'armata turca dà spalle et comodità a li corsari fazino danni, i qual vanno con suo consentimento. *Unde* ha scritto a Costantinopoli di tute queste operation, et lamentandosi non ha quel capitano osservà el comandamento dil Gran Signor, però non fazi moto fin el non zonza a Costantinopoli. Et manda la copia di la dita letera. *Item*, scrive, el soracomito Zen è zonto da lui, l'ha posto in mezo galla et trovandolo in dolo, lo castigerò.

*Dil dito, di 29, ricevute ut supra.*

Scrive longamente in materia de biscoti si provedi per l'armata.

*Da Corfù, dil rezimento et proveditor zeneral Moro, di 27 Avosto, ricevute a dì 15.* Havemo hauto letere dil capitano di la Parga, di 24, come ha di la Prevesa, che a dì 19 l'armata si levò de li per andar via, et che a la Prevesa era restà una fusta turchesca, la qual ogni matina se scopre fuora di la boca, nè cessa tutavia far qualche preda, poi ritorna dentro quel golfo.

*Da la Zefalonia, di sier Andrea Valier proveditor, di 16 Avosto, ricevute a dì 15 Settembre.* Scrive gran mal de sier Zacaria Orio camarlengo de li, cargandolo molto, *ut in litteris.*

*Dil dito, di 23, ricevute ut supra*, et è di ore 10, avisa a dì 20, la matina a l'alba, l'armata turchesca vene parte in canal di Palechii et parte in porto del Argostoli, et stete fino a dì 23, nel qual zorno a hore 5 di zorno se levò et andò unita a la volta dil Zante. Mandai a' visitar quel capitano di l'armata, el qual mi mandò uno zaus con alcuni turchi dicendo voleva carnazi et refrescamenti. Li dissi che li bestiami erano andati lontani per dubito de essa armata et staria assà ad aspetar. Et che si preparava de farli un presente, et il dì drio li mandai el presente, tra animali, miele et altre cose per ducati 20, computà alcuni danari dati al zaus et dragoman, scusando el loco non li è case, *solum* la forteza con li soldati, poi non havemo inteso el suo venir, si haveria provisto, con altre bone parole. Il qual zaus disse, il capitano havia hauto comandamento dal Signor, l'armata andasse a Costantinopoli et parte a Modon, parte a Lepanto. Di tuto ho scritto al clarissimo zeneral, etc.

*Dal Zante, di sier Matio Barbarigo proveditor, di 16 Avosto, ricevute a dì 15 Settembre.* Si scusa haver scritto molte letere et recapitola il tempo. Avisa heri vene quì et sorse in porto Curtogoli, con galle 4, galeote 3, et fuste 3, disse andava per trovar 10 fuste de ladri et va verso el golfo de Patras. Et uno nostro tornato di Chiarenza dice, heri sera passò 6 fuste di là via, che vanno verso Modon, et il comito di Curtogoli disse, quando se partirono di la Prevesa se partite *etiam* Alutuffi Chiecaia con 12 galle, per andar a meter nel castelo di Patras et nel castel di Lepanto artellarie, et discargate doveano ritornar a l'armata in la